

Gij Dinfwngz Guh Cejsa Lingzyinz

□ Maj Veiyungz comz hoiz



▲ Vunzmbanj bae gwnz ndoi raemj aeu faexcuk ma.



▲ Daengx ranz vunz comz dwk buq faexcuk baenz diuz.



▲ Dawz diuz faexcuk cuengq roengz cingj aeu raemxhoi cimq.



▲ Faexcuk lauz hwnj swiq seuq le couh caij cauz.



▲ Bouxsai caij doiq daem faexcuk baenz naezgiengh.

Gij dinfwngz guh cejsa Lingzyinz gag riuzcienz youq Lingzyinz Yen Lozlouz Cin Mbanj Loegyuz, dwg gij dinfwngz seiqcib lai hoh Bouxgun dangdieg ciuh cienz ciuh haenx. De caeuq gij dinfwngz fapdoj guh ceij faexcuk gwnzbiengz geiq youq ndaw 《Diengoeng Haihuq》gig dox-lumj, dwg gij hwngfat fapguhceij ndaw seiq daih fatmingz.

Lingzyinz Yen fwnraemx lairaeuh hix yinzrwd, gij dienheiq daegbied haenx gig habngamj faexcuk majhung. Moix bi ndwenseiq daengz ndwenngux, baenz buek faexcuk oiq couh deng bouxguhceij raemj roengzdaeuq, youh cimq roengz raemxhoi bae, cimq daengz cousou gvaq le, boux-guhceij couh hainduj guh hong lo.

Gij dinfwngz guh cejsa gig fukcab, daj faexcuk bienqbaenz ceij yaek aeu ginggvaq haujlai bouh, gij cwngzsi baumiz: Raemj faexcuk、cimq raemxhoi、swiq hoi ok、daem liuh、caij cauz、gya raemxvad、lauz ceij、dimz ceij、giemj ceij、dak hawq daengj, cienzbouh dwg aeu vunz guh. Daih'it, gij faexcuk yaek aeu raemxsaw ma dongjswiq, caiq doenggvaq caij cauz, daem baenz naezboengz bae. Gij fuengsik aeu vunz ma dajgiengh daegbied haenx hawj gij nyinz ndaw gienghceij baujlouz ndaej haemq ndei. Yienzhaeuh dawz gienghceij caeuq gij iengfaex diencoeng gya haeuj ndaw cingj bae gyaux yinz, gij yenzliuh guh ceij couh loengh ndei lo. Doeklaeng couh aeu aen gvaenghgyaq gwnzde miz yiemz faexcuk haenx bae ndaw cingj gienghceij raeng aeu gij nyinz fouz youq gwnzde haenx, guh baenz ceijmbaw mbaeq. Gyoengq gunghyinz raeng dwk miz gvilwd dangqmaz, yienghneix doenghgiy nyinz couh ndaej baiz ndaej yinz. Gyoengqde youh dawz aen gvaenghgyaq fonj gvaqdaeuq, hawj gij ceij mbaeq loenq roengz gwnz benjceij bae, caenh raemhrex bouh hong neix, deq gij ceij mbaeq daeb dwk ca mbouj geijlai, couh youq gwnzde dimz gepbenjfaex roxnaeuz gepbenjrin. Gwnzde dimz dwk naek le, couh ndaej caenx gij raemx okdaeuq. Deq raemx caenx ok liux le, couh baez mbaw baez mbaw giemj mbawceij hwnjdaeuq. Gij cejsa ngamq guh baenz neix henjoiq henjoiq, miz caetcib ngeih lizmij raez, ngeihcib sam lizmij gvangq, gij naz de yinz raixcaix, lumhlax hwnjbae lwenqdwtdwt, unqnemq cix ndaej naih muz, aeu bae sij saw, gij maeg de hix mbouj iemq daeuq daej, diemj feiz coemh ne hoenz noix daeuh hix noix, vunz aeu daeuq guh ceijei ceijcienz caeqbaiq lai.

Bi 2012, gij hanghmoeg dinfwngz guh cejsa Lingzyinz ndaej senj haeuj buek daihseiq swigih feihvuzciz vwnzva yizcanj baujhoh mingzloeg.



▲ Gwnz diegdangz dak rim cejsa.



▲ Naezgiengh faexcuk gyaux ieng faexdiencoeng le yunghrengz gyaux yinz.



▲ Hong lauzceij yaekaeu saeqsim goengfou laeg.



▲ Mwh atdaenz caenx raemx yaek miz rengz cij ndaej.



▲ Dab ceij atcaenx raemx ok liux le dwg yienghneix.



▲ Mehmbwk hainduj giemj ceij bae dak lo.